

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

P R A V I L N I K
o jedinstvenim kriterijima i pravilima za zapošljavanje branilaca i članova
njihovih porodica u institucijama Tuzlanskog kantona

Tuzla, juni 2014. godine

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06 i 13/11), a u vezi sa članom 16. Zakona o dopunskim pravima branilaca i članova njihovih porodica - prečišćeni tekst („Službene novine Tuzlanskog kantona“, br. 5/12 i 5/14) i zaključkom Skupštine Tuzlanskog kantona broj: 01-02-398-14/14 od 09.06.2014. godine, na sjednici održanoj dana 24.06.2014. godine, Vlada Tuzlanskog kantona, d o n o s i

PRAVILNIK

o jedinstvenim kriterijima i pravilima za zapošljavanje branilaca i članova njihovih porodica u institucijama Tuzlanskog kantona

I - OSNOVNE ODREDBE

Član 1.

(Predmet Pravilnika)

Ovim Pravilnikom utvrđuju se jedinstveni kriteriji i pravila za zapošljavanje branilaca i članova njihovih porodica u institucijama Tuzlanskog kantona.

Član 2.

(Korisnici prava)

Pod braniocima i članovima njihovih porodica podrazumjevaju se lica iz člana 1. i člana 4. Zakona o dopunskim pravima branilaca i članova njihovih porodica - prečišćeni tekst („Službene novine Tuzlanskog kantona“, broj: 5/12 i 5/14, u daljem tekstu: Zakon) bez obzira na starosnu dob.

Član 3.

(Definicije)

(1) Član porodice šehida, poginulog, umrlog, nestalog branioca i umrlog ratnog vojnog invalida, u smislu ovog Pravilnika je korisnik prava na porodičnu invalidninu, na osnovu konačnog rješenja nadležnog organa, izdatog u skladu sa važećim federalnim propisima iz oblasti boračko - invalidske zaštite.

(2) Dijete šehida, poginulog, umrlog, nestalog branioca bez oba roditelja, u smislu ovog Pravilnika, je član porodice šehida, poginulog, umrlog, nestalog branioca, koje je u vrijeme gubitka oba roditelja bilo mlađe od 15 godina života, kao i nakon navršene 15-te godine života, ukoliko se nalazilo na redovnom školovanju, a najkasnije do navršene 25-te godine života, odnosno, koje je nesposobno za privređivanje, ukoliko je nesposobnost za privređivanje nastupila prije navršene 15-te godine života, odnosno, 25-te godine ukoliko se nalazilo na redovnom školovanju.

(3) Ratni vojni invalid, u smislu ovog Pravilnika, je branilac kojem je to svojstvo utvrđeno rješenjem nadležnog organa, izdatog u skladu sa važećim federalnim propisima iz oblasti branilačko-invalidske zaštite, a po osnovu zadobijene rane, povrede, bolesti ili pogoršanja bolesti, usljed čega je nastupilo oštećenje njegovog organizma najmanje za 20%.

(4) Djetetom ratnog vojnog invalida/dobitnika priznanja i odlikovanja/demobilisanog branioca/mirnodopskog vojnog invalida, u smislu ovog Pravilnika, smatra se dijete rođeno u braku/van braka, pastorče ili usvojeno dijete, mlađe od 15 godina života, kao i iza navršene 15-te godine života, ukoliko se nalazi na redovnom školovanju, a najkasnije do navršene 25-te godine života, odnosno, koje je nesposobno za privređivanje, ukoliko je nesposobnost za privređivanje nastupila prije navršene 15-te godine života, odnosno, 25-te godine ukoliko se nalazilo na redovnom školovanju, koje ratni vojni invalid/demobilisani branilac/mirnodopski vojni invalid izdržava, odnosno koje je izdržavao do momenta smrti, ukoliko je riječ o umrlom ratnom vojnom invalidu/demobilisanom braniocu/mirnodopskom vojnom invalidu.

(5) Dobitnik ratnog priznanja i odlikovanja i član uže porodica poginulog, umrlog ili nestalog dobitnika ratnog priznanja i odlikovanja, u smislu ovog Pravilnika, je korisnik prava na mjesečni novčani dodatak, na osnovu konačnog rješenja nadležnog organa, u skladu sa odredbama Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije Bosne i Hercegovine“, broj: 70/05, 61/06, 9/10 i 14/13).

(6) Mirnodopski vojni invalid, u smislu ovog Pravilnika, je lice koje je u miru bez namjere, vršeći vojnu dužnost, zadobilo ranu ili povredu, pa je zbog toga nastupilo oštećenje njegovog organizma najmanje za 20%, odnosno kod kojeg je usljed bolesti ili pogoršanja bolesti nastupilo oštećenje njegovog organizma najmanje za 60% u periodu od 24.12.1996. godine i to:

- a) vojno lice na služenju obaveznog vojnog roka,
- b) pitomac u vojnoj školi,
- c) pripadnik rezervnog sastava za vrijeme vojne dužnosti.

(7) Mirnodopskim vojnim invalidom, koji je svoje pravo stekao do 06.04.1992. godine, u smislu ovog Pravilnika, smatra se lice, kome je taj status priznat Zakonom o osnovnim pravima vojnih invalida i porodica palih branilaca i čija su prava po tom osnovu utvrđena rješenjem nadležnog organa.

(8) Član uže porodica ratnog/mirnodopskog vojnog invalida, dobitnika priznanja i odlikovanja, demobilisanog branioca, umrlog ratnog/mirnodopskog vojnog invalida i umrlog demobilisanog branioca, u smislu ovog Pravilnika, je bračni partner, vanbračni partner, u smislu člana 3. Porodičnog zakona Federacije Bosne i Hercegovine („Službene novine Federacije Bosne i Hercegovine“, broj 35/05 i 41/05), djeca rođena u braku i van braka, usvojena djeca i pastorčad.

(9) Braniocem se smatra pripadnik Armije Republike Bosne i Hercegovine, Hrvatskog vijeća odbrane i policije nadležnog organa unutrašnjih poslova (u daljem tekstu: Oružane snage) koji je učestvovao u odbrani Bosne i Hercegovine (početak agresije na općinu Ravno) od 18.09.1991. do 23.12.1996. godine, odnosno do prestanka neposredne ratne opasnosti i koji je demobilisan rješenjem nadležnog vojnog organa, kao i lice koje je učestvovao u pripremi za odbranu i u odbrani Bosne i Hercegovine u periodu prije 18.09.1991. godine, a koje je angažovano od nadležnih organa.

Član 4.

(Posebni korisnici prava)

(1) Dijete šehida, poginulog, umrlog, nestalog branioca i umrlog ratnog vojnog invalida, u smislu ovog Pravilnika, je lice koje je izgubilo pravo na porodičnu invalidninu zbog punoljetnosti i/ili prestanka redovnog školovanja, a koje nije napunilo 25 godina života.

(2) Dijete poginulog, umrlog ili nestalog dobitnika ratnog priznanja i odlikovanja, u smislu ovog Pravilnika, je lice koje je izgubilo pravo na mjesečni novčani dodatak zbog punoljetnosti i/ili prestanka redovnog školovanja, a koje nije napunilo 25 godina života.

(3) Udovica šehida, poginulog, umrlog, nestalog branioca, u smislu ovog Pravilnika, je lice koje nije korisnik prava na porodičnu invalidninu zbog neispunjavanja uslova iz člana 20. stav (1) tačka 1) Zakona o pravima branilaca i članova njihovih porodica („Službene novine Federacije Bosne i Hercegovine“, br. 33/04, 56/05, 70/07 i 9/10 i 95/13, u daljem tekstu: Federalni zakon) (bez djece, nema navršenih 45 godina života i nije proglašena nesposobnom za privređivanje), pod uslovom da nije stupila u brak ili vanbračnu zajednicu.

(4) Udovica umrlog ratnog vojnog invalida, u smislu ovog Pravilnika je lice koje nije korisnik prava na porodičnu invalidninu iz člana 21. st. (5) i (6) Federalnog zakona (gdje ne postoji uzročno-posljedična veza) i udovica umrlog demobilisanog branioca, pod uslovom da nije stupila u brak ili vanbračnu zajednicu.

II – KRITERIJI ZA VREDNOVANJE

Član 5.

(Prioritet pri zapošljavanju)

(1) Lica iz člana 2. ovoga Pravilnika, bez obzira na starosnu dob, koja su na evidenciji službe za zapošljavanje, imaju pravo na prvenstvo pri zapošljavanju, ukoliko ispunjavaju opće i posebne uslove za radno mjesto na kojem se vrši zapošljavanje i u skladu sa kriterijima utvrđenim općim aktom institucija Tuzlanskog kantona.

(2) Institucije Tuzlanskog kantona, u općim aktima kojima se reguliše zapošljavanje, obavezne su pored općih i posebnih kriterija iz stava (1) ovog člana, kao jedan od kriterija predvidjeti i pripadnost braniocima i članovima njihovih porodica.

(3) Institucije Tuzlanskog kantona obavezne su prilikom raspisivanja javnog konkursa kao dokaz o pripadnosti branilačkoj populaciji tražiti dostavu dokumenata, koja su propisana u prilogu ovoga Pravilnika i čini njegov sastavni dio.

Član 6.

(Vrednovanje)

(1) Pripadnost braniocima i članovima njihovih porodica ima se vrednovati sljedećim redoslijedom:

- a) član porodica šehida, poginulog, umrlog i nestalog branioca,
- b) ratni vojni invalid,
- c) dobitnik ratnog priznanja i odlikovanja,
- d) demobilisani branilac i
- e) članovi porodice ratnog vojnog invalida, dobitnika ratnog priznanja i odlikovanja i demobilisanog branioca.

(2) Vrednovanje pripadnosti po kriteriju iz stava (1) ovog Pravilnika vrši se na način da se licu nakon bodovanja po osnovu općih i posebnih kriterija, na ukupan broj ostvarenih bodova, u zavisnosti od pripadnosti branilačkoj populaciji dodaju i dodatni bodovi, kako slijedi :

- a) lice u statusu člana porodice šehida..... 30%,
- b) lice u statusu ratnog vojnog invalida sa i preko 60% vojnog invaliditeta.....25%,
- c) lice u statusu ratnog vojnog invalida do 60% vojnog invaliditeta.....24%,
- d) lice u statusu demobilisanog branioca sa i preko 24 mjeseca učešća u OS.....23%,
- e) lice u statusu demobilisanog branioca do 24 mjeseca učešća u OS.....21%,
- f) lice u statusu člana porodice ratnog vojnog invalida22%,
- g) lice u statusu člana porodice demobilisanog branioca sa i preko 24 mjeseca učešća u OS.....20%,
- h) lice u statusu člana porodice demobilisanog branioca do 24 mjeseca učešća u OS.....19%.

(3) Dobitniku priznanja i odlikovanja i djetetu dobitnika priznanja i odlikovanja iz reda: Značka „Zlatni ljiljan“, Red hrvatskog trolista, Orden slobode, Red bana Jelačića, Orden Heroja oslobodilačkog rata, Red Nikole Šubića-Zrinjskog, Orden oslobođenja, Red Kneza Domagoja sa ogrlicom, Orden „Zlatnog grba sa mačevima“, Orden „Zlatnog ljiljana sa zlatnim vijencem“, Orden „Zlatnog ljiljana sa srebrenim vijencem“, Medalja za hrabrost, Medalja pobjeda, Medalja otpora, Medalja za vojne zasluge, Policijska Medalja za hrabrost i Zlatna policijska značka – zvijezda, na bodove iz stava (2) ovog Pravilnika, pripada po dodatnih..... 5 bodova.

(4) Djetetu dobitnika priznanja i odlikovanja iz reda: Značka „Zlatni ljiljan“, Red hrvatskog trolista, Orden slobode, Red bana Jelačića, Orden Heroja oslobodilačkog rata, Red Nikole Šubića-Zrinjskog, Orden oslobođenja, Red Kneza Domagoja sa ogrlicom, Orden „Zlatnog grba sa mačevima“, Orden „Zlatnog ljiljana sa zlatnim vijencem“, Orden „Zlatnog ljiljana sa srebrenim vijencem“, Medalja za hrabrost, Medalja pobjeda, Medalja otpora, Medalja za vojne zasluge, Policijska Medalja za hrabrost i Zlatna policijska značka – zvijezda, na bodove iz stava (2) ovog Pravilnika, pripada po dodatnih..... 4 boda.

Član 7.

(Ograničenje prava)

Pravo iz člana 5. stav (1) ovog Pravilnika ne može ostvariti lice kome je radni odnos prestao njegovom krivicom ili je po prestanku radnog odnosa ostvario pravo na otpremninu, odnosno koje je korisnik prava na porodičnu penziju.

III PRELAZNE I ZAVRŠNE ODREDBE

Član 8.

(Novčane kazne)

Novčanom kaznom u visini od 1.000 do 3.000 KM kaznit će se odgovorna lica organa ili pravnog subjekta zbog nepoštivanja dopunskog prava koje se odnosi na zapošljavanje branilaca i članova njihovih porodica, shodno članu 57a. Zakona o dopunskim pravima branilaca i članova njihovih porodica.

Član 9.

(Datum stupanja)

Ovaj Pravilnik stupa na snagu danom donošenja, a bit će objavljen u "Službenim novinama Tuzlanskog kantona."

BOSNA I HERCEGOVINA
Federacija Bosne i Hercegovine
TUZLANSKI KANTON
VLADA

Broj: 02/1-
Tuzla, 24.06.2014. godine

PREMIJER KANTONA

Prof. dr. Bahrija Umihanić

Prilog:

**POPIS DOKUMENTACIJE KOJOM SE DOKAZUJE STATUS BRANILACA I
ČLANOVA NJIHOVIH PORODICA**

R.broj.	Pripadnost branilačkoj kategoriji	Naziv dokaza- dokumenta	Organ koji ga izdaje
1.	Član porodice šehida, poginulog, umrlog, nestalog branioca,	Rješenje o priznatom pravu na porodičnu invalidninu,	Općinska služba za boračko-invalidsku zaštitu
2.	Ratni/mirnodopski vojni invalid	Rješenje o priznatom svojstvu ratnog/mirnodopskog vojnog invalida	Općinska služba za boračko-invalidsku zaštitu
3.	Dobitnik ratnog priznanja i odlikovanja	Rješenje o priznatom pravu na mjesečno novčano primanje dobitniku priznanja	Općinska služba za boračko-invalidsku zaštitu
4.	Demobilisani branioci,	Uvjerenje o učešću u Oružanim snagama	Odjeljenje odbrane prema mjestu prebivališta
5.	Članovi uže porodice: a) ratnog/mirnodopskog vojnog invalida, b) dobitnika ratnog priznanja i odlikovanja c) demobilisanog branioca,	Rješenje o priznatom pravu na: a) invalidninu, b) mjesečni novčani dodatak c) uvjerenje o učešću u Oružanim snagama	Općinska služba za boračko-invalidsku zaštitu Odjeljenje odbrane prema mjestu prebivališta